

東  
華  
續  
錄

東華續錄

光緒一百八十二

臣朱壽朋敬編

臣曾玉琛恭校

八月壬子朔諭王公百官等奏恭逢 慈禧端佑康頤昭豫莊誠壽恭欽獻崇熙皇太后七旬萬壽接案  
報効廉俸同深慶賀一摺朕欽奉 慈旨現在時事艱難物力凋敝來年慶典不許鋪張深宮宵旰勞  
常以節用愛人爲念京外大小臣工惟當各矢公忠力求盡職期於民康物阜上慰虛懷所有報効廉俸  
著毋庸置議欽此仰承 慈訓用特宣布德音著卽欽遵辦理○癸丑以溥綱署理藩院左侍郎○以剿  
平奉天邊外盜匪予總兵楊玉書等升敘有差○甲寅柯逢時電致外務部探聞桂事頗急臨桂縣近城  
數里許之關雞潭七月間匪徒有劫掠考生之事又距城六十里之六塘墟及永福縣屬之鹿寨地方均  
有匪黨搶劫情事乞代奏 上諭軍機大臣等柯逢時奏悉據桂匪漸逼省城何以岑春煊前日電  
奏並未提及且謂南甯鎮安歸順等處漸可肅清柳慶剿匪亦有起色柯逢時著迅速赴任據實具奏並  
著岑春煊將近省一帶情形查明覆奏○丙辰柯逢時奏粵西匪勢糾紛用兵已久自督督 臣岑春煊親  
臨前敵又約前提 臣馮子材會同辦理並奏派大員督辦邊防徵兵數十營用款百餘萬實屬不遺餘力

區區小醜尙未能計日蕩平蓋胛骨之疽筋肉俱壞憂生之草根株已深非急切所能程其功也部署既定次第廓清殘破之餘民生日感若不急圖安集一有匪徒煽誘恐死灰復燃則鄉團爲最要矣夫鄉團亦需餉械此時恐非民力所能勝且各州縣必須有固結練習之親兵乃可以壯聲威而資控制擬到任後通飭各州縣酌度情勢多募三百名小者亦不減百名又飭各府及直隸州各募二三百名均給予餉械平時加意訓練有警則聲息相通以民團爲守扼塞要隘以親兵爲戰保固疆域以府直隸州之親兵爲策應之師各率其屬而預爲之防若武備不修致匪闖入境地則分別治以重罪蓋治亂相爲倚伏官勢盛則匪皆爲民匪勢盛則民皆爲匪必地方官力能自保乃可以保民亦必民信官之果能保民乃同心協力以自保又必官民之互相保而禍亂乃可以不生此上下相維之勢臣前摺所稱兼募土兵之說也伊古以來辦匪之法無逾於此綜計府屬州縣親兵約一萬五六千名加以餉械一切之需總在百萬以外其邊徼駐防之營尙不在此數古人躬行節儉惟兵事則日用財欲泰廣西緣營疲弱練軍月餉甚輕不肖員弁多方剋扣臨事譁潰勢所必然似應酌量節併優給月餉購買利器以時訓練統以賢員其間雖不免勞費然較之事變既起徵集大兵其勞逸則有間矣臣前派員前往偵探桂林平樂梧州各府均有匪蹤伏而未發不杜其萌爲害方長廣西一隅關係大局全省糜爛悍匪縱橫撫之則因民爲糧

則之則以鄰爲壑此不得不急圖變計思爲一勞永逸之謀雖其事甚迂而其說則固無以易也軍事連年迭遭歉歲本年桂平梧州鬱林一帶間穫豐收餘則荒蕪燭望轉瞬臘冬屆序啼饑號寒亟應豫籌撫綏並代籌耕牛籽種災區既廣所費不貲又瘠苦州縣歲入無多不足以供朝夕此時公私交迫措手無從不爲謀其芻牧之資而違責以治平之效此則事之所必無者也竊計民困之深惟廣西爲最甚而度支之絀與用欸之煩至此而尤急兵餉賑撫貼補之費兩年之內無論如何節省每歲總需三百萬兩臣所請撥欸百萬不過三分之一此外擬創行票紙開辦捐輸以期周轉目前實難湊成鉅欸夫財力匱乏則人心動搖欲爲地方策安全必先爲地方籌經費外洋富強之術率以全力振疲區故貧弱立變爲蕃盛廣西事已至此各前疆臣豈盡不肖惟欸絀力窮未能及時撲滅劇至軍皆渙散民不聊生東南伏莽四面響應此時情形想未盡達 聰聽各部臣狃於故常靳此區區之欸是視邊陲爲無足重輕之數徒令養癰貽患異時將不可勝言惟有籲懇 聖恩俯准歲撥的欸百萬以二年爲期並請 諭飭各疆臣酌量力所能及借撥一欸卽於各省所收廣西捐輸項下陸續歸還臣受 特達之知畀以疆圉之重因循欺飾非所敢爲惟到任以後無兵可用無餉可籌雖賢者亦難善其後況如臣之迂疏寡效必致束手而無能爲卽躬受譴訶已貽地方無窮之患此臣所以爲再三之瀆請冀稍有憑藉仰副 聖慈將民水

火之心得 旨戶部速議具奏○丁巳諭前有旨派王文韶劉鴻鵬張翼辦理路礦事宜現在設立商部  
所有路礦事務應歸併商部以專責成路礦總局著即裁撤○江寧將軍信恪因病乞休允之○商部奏  
臣部綜理商務擬請設立鐵路礦務農務工藝各項公司業於籌議章程摺內詳晰具奏查泰西各國商  
政首重設立公司中國風氣初開臣等創始經營良非易事加以商情渙散財力未充從前各省開設局  
廠或官督商辦或官商合辦每因章程未善不免有牽掣抑勒等弊以致羣情疑阻現臣部辦理一切首  
在破除積習以期上下相孚事權歸一惟臣等竊有鯁鯁過慮者則以管轄之權雖在臣部而所辦農工  
路礦諸務無一非地方大吏之責成如或內外隔閡未能合力振興勢將無所措手相應請 旨飭下各  
省將軍督撫於臣部所設各公司事宜務須會同籌畫輔助維持一面嚴飭各該管道府州縣盡力保護  
毋稍膜視至臣部派出考察商務各員亦必選擇誠實通達之人應與地方官彼此接洽俾得呼應靈通  
如係該省自行籌辦尤須廣為蒞勸力杜弊端並將辦理情形隨時知照臣部實資查覈臣等受 恩深  
重兢兢以不克稱職為慮該將軍督撫等必能共矢公忠顧全大局倘或推諉因循及該管地方官遇事  
不能襄助以致商務久無起色臣等即當據實奏明不敢稍涉遷就 上諭商部奏擬於各省設立路礦  
農務工藝各項公司請飭各將軍督撫會同籌辦等語現在振興商務全在官商聯絡一氣以信相孚內

外合力維持廣爲勸勉以期日有起色各省將軍督撫於商部議設各項公司會同籌畫悉心經理並飭該管道府州縣隨時認真保護倘有推諉因循仍前膜視該部卽行據實奏聞力除礦蔽毋稍遷就○戊午祭社稷壇上親詣行禮○上奉慈禧端佑康頤昭豫莊誠壽恭欽獻崇熙皇太后幸頤和園駐蹕○以永隆爲江甯將軍○庚申上詣奉先殿壽皇殿行禮○外務部奏光緒二十九年七月二十日熱河都統松壽奏續修礦章推廣辦法一摺本日奉硃批外務部議奏單併發欽此欽遵由軍機處將原奏清單鈔交前來查原奏內稱熱河辦礦章程大綱四條細目二十四條經前都統錫良開單奏明在案近日官辦商辦各有遵循以故風氣大開呈請開採查接踵而來課款亦日有起色然利之所在弊卽生焉細繹原定章程本爲至周且密但近來辦礦商往往從指明地段限制之外任意侵踰其經手之人又或以多報少冀圖朦混隱瞞若不先事預防流弊必種種不絕至蒙旗山分之外前經外務部核議酌提礦稅以示體恤擬由官課內提給一成並不取之礦商以昭大信此哲原奏未盡事宜悉心酌議應卽續行添入若銅鉛錫鐵等礦口外探者向屬寥寥故原定章程稅則止及金銀煤礦並未議及此項若不明定章程一經開辦必多狡執應酌定辦法俾有遵循謹續擬礦章四條應請 敕下外務部核議等語等查熱河辦礦章程業經臣部於本年二月間核議奏明在案惟開辦礦務關繫緊要如

有未盡事宜自應隨時釐訂以期妥善茲據熱河都統松壽續擬章程四條等詳加查核其第一條所載開礦地界以圖圓計算一節礦地界址本應劃清以防侵佔現擬將原定大礦二十里小礦十里之界均以圖圓計算並標明四至繪圖立案自足杜礦商影射侵踰之弊其第二條所載礦局賬目檢簿核對一節礦產採取多寡原以礦局賬目為憑非詳細核算經手之人即不免以多報少希圖漏稅現擬將每月出數若干核實登簿蓋用戳記聽候委員檢簿查核庶就礦徵稅不至稍有隱匿其第三條所載礦稅一成提給蒙旗一節臣部於議覆前熱河都統錫良奏擬定礦章摺內業經聲明應將課稅酌定提歸各旗成數以補糧之不足現擬以稅課一成提給蒙旗核與臣部奏案相符該款出自公家於礦商課稅並無加增尚屬公允其第四條所載銅錫鉛鐵各礦分別大小呈交押課銀兩並照值百抽十升課一節熱河金銀各礦押課章程大礦交銀三百兩現擬將銅錫鉛鐵各礦分交押課銀大者六百兩小者二百兩較金銀各礦為輕應令如數交納至以值百抽十升課則較熱河金礦值百抽六銀礦值百抽八章程為重不足以昭平允應令均照值百抽五升課作為暫行試辦章程俟另定通行稅章仍令一律照辦以上各條除銅錫鉛鐵抽收稅課應照臣等所擬辦理外其餘均可補原章所未備自應准如所請如蒙俞允即由臣部咨行熱河都統歸入前定章程一併遵照辦理得旨如所議行○辛酉袁世凱等奏臣等

欽奉光緒二十九年六月初七日 上諭工部奏正陽等門城垣樓座情形請飭修葺一摺此項工程著仍派袁世凱陳懋切實勘估俟正陽門修竣後所餘之款即行分別輕重陸續修理欽此遵經飭派天津道王仁寶試用道尹家楨按照工部原單逐段勘明核實估計去後茲據該道等勘得正陽等門城垣樓座各處情形與工部原奏清單大致相符惟工段甚多情形不一其尤爲重大者如德勝門大樓圍樓頭停破壞大木間有腐朽朝陽門迤北城牆陷深三四尺不等長至二十餘丈誠如工部原奏工程緊要勢難緩修至西直門角樓上年業經工部估價未修本年又經步軍統領衙門咨請工部修理體制攸關自應修葺以壯觀瞻其餘各項工程坍塌已甚但地非衝要暫可從緩茲將德勝門大樓圍樓朝陽門城牆西直門角樓三項工程擬就做法切飭廠商核實估計據稱各項物料概歸商辦約需銀二十五萬兩係按現在情形而言若年復一年工程加重尙恐不止此數查各省報効正陽門工款共銀五十二萬三千餘兩內除直隸報効銀五萬兩撥濟京師醫學堂經費滇省報効銀一萬兩因軍務緩解外實計銀四十六萬三千四百餘兩除應付正陽門大樓圍樓工程銀四十二萬九千九百餘兩又撥修馬道等工銀一萬三千餘兩所餘工款僅銀二萬四百餘兩以之撥修德勝門樓等三項工程尙不敷銀二十二萬餘兩將來正陽門樓修竣自當奏撥專款以濟工用至西直門角樓殘缺太甚 鑾輿臨幸 頤和園時該處



切近 鐵路應將參差不齊之木石磚瓦先行拆平以示齊整等情稟請撥奏前來 臣等謹查工部原奏單開各工多至一百五十餘處昨准部咨續出工程又有二十餘處若擬同時興修實恐無此財力現就情形最重之德勝門樓朝陽門城牆西直門角樓三項工程約略估計已需銀二十五萬兩而正陽門樓正款除撥用外所餘無多撥作德勝門樓等三項工款尚不及十分之一惟有俟正陽門樓工竣再行覈勘估計請 旨定奪其餘各工從緩估辦至各工地段縣長照料匪易現在既未興修應請 旨飭下步軍統領衙門飭令弁兵隨時查勘情形咨報工部以昭慎重得 旨如所議行○壬戌以徐世昌爲商部左丞唐文治爲商部右丞紹昌爲商部左參議王清穆爲商部右參議○綏遠城將軍恆壽卒予祭葬賞其子員外郎崇福以郎中卽補○以貽穀爲綏遠城將軍○以德麟爲庫倫辦事大臣○癸亥以增崇爲兵部左侍郎○以德峯爲鑲藍旗蒙古副都統○乙丑諭岑春煊電奏廣東陸路提督程允和統帶三營辦理惠州清鄉不但無功匪勢益熾請旨懲處等語程允和以革職人員經朝廷棄瑕錄用乃竟不知振作畏葸因循竊屬辜恩瀆職廣東陸路提督程允和著卽行革職餘著照所議辦理仍著岑春煊等督飭各營認真辦理清鄉嚴拿匪類務獲懲治除暴安良以靖地方○丁卯張之洞奏 臣前於四月間面奉 皇太后懿旨以出洋學生流弊甚多飭籌防範之法當經面奏學生在外國境內中國法令難行必須先

商彼國政府允爲協助事始有滿仰蒙 慈允遵卽晤商駐京日本使臣內田康哉與籌辦法該使臣以兩國律法不同辦理動多窒礙談次頗有難色繼經劃切開譬告以出洋學生如不妥籌約束聽其浮游廢學任性妄爲犯義干名陷於罪戾則此後有志之士不復敢遠游就學往取師資其先已在洋篤志力學者亦且懼爲牽累廢然思返永無成就通才之日爲害不可勝言該使臣審思至再始謂如有妥善辦法亦願電彼政府贊成此舉惟必須中國於安分用功學成回國之學生予以確實獎勵使各學生有歆羨之心併使彼國學堂確見中國有勸學求才之實意始於不安分學生有助我約束之法屬先酌擬章程再爲商辦 臣業於閏五月二十九日 召對時面奏大略在案伏查游學日本學生年少無識惑於邪說言動譁張者固屬不少其循理守法潛心嚮學者亦頗不乏人自應明定章程分別懲勸庶足以杜流弊而勵真材當卽酌擬約束游學生鼓勵畢業生章程各一通迭次與日本使臣往返商榷復由該使臣轉達政府與各學校校長公同會議期於中國學生有裨而於彼國法權無礙斟酌至於再四日來始克議成計擬定約束章程十款鼓勵章程十款又另擬自行酌辦立案章程七款凡所以嚴防範考察之方廣鼓舞裁成之道綱領粗具於是從此切實施行則以後游學生體特逃蔽失所悉依已往者當知敏戢續往者亦有範圍上以示 朝廷彰揮之公下以昭學術邪正之辨庶足挽橫流而宏造就至鼓勵章程

中擬給學生舉人進士等出身係遵光緒二十七年八月初四日 上諭辦理其擬獎翰林出身並翰林升階者係於大學堂專科及大學院研究科畢業之生學業精深在彼國亦視為上選計其續學年分已逾十五六年較之新進士館選其難已加數倍且須俟回國後由 欽派大臣詳加察核果係品行端謹毫無過犯並按照所學科目切實考驗確與所得學堂文憑相符始行奏請給獎似尙不致冒濫以上各節均經隨時與外務部王大臣詳加商酌核定始與日使定議謹分繕清單恭呈 御覽如蒙 俞允擬請 旨飭下外務部將前項約束鼓勵章程照送日本使臣內田康哉轉達彼國政府分飭各學堂一律照辦一面由外務部迅將自行的辦立案章程刊印成冊飛咨出使日本大臣出洋學生總監督照章認真舉辦並通咨各直省暨京師管學大臣一體遵照辦理得 旨著照所請外務部管學大臣知道○以李福興爲廣東陸路提督白金柱爲廣東瓊州鎮總兵○戊辰貴州提督蔣宗漢卒予祭葬建祠戰功事蹟交國史館立傳賞其子降補同知蔣關齡開復道員○己巳以楊昌魁爲貴州威寧鎮總兵○商約大臣呂海寰盛宣懷與美商約大臣駐京使臣康格駐滬總領事百納商議希孟在上海續議通商行船條約十七款成其文曰 大清國 大皇帝大美國大總理鑒天德因欲推廣彼此之商務及振興兩國人民之利益又因於一千九百零一年九月七號會定議和條約之第十一款內開 大清國國家允定將

通商行船各條約內諸國視爲應行商改之處及有關通商各項事宜均行議商以期妥善簡易等因是以大清國特派欽差辦理商約事務大臣工部尚書呂海寰欽差辦理商約事務大臣太子少保前工部左侍郎盛宣懷大美國特派欽差修定商約事宜駐劄中國便宜行事全權大臣康格欽差修定商約事宜駐滬總領事古納欽差修定商約事宜駐滬商董希孟各將所奉特賜之權互相校閱俱屬妥當現將兩國從前所立之通商行船各條約會議修改及議定增補各款以期利便通商開列於左 第一款現照公例並因中國 欽差辦理交涉大員應得駐劄美國京城其所享一切特權並優例及豁免利益均照相待最優之國所派之相等欽差辦理交涉大員一體接待享受是以美國欽差辦理交涉大員亦應得駐劄中國京城凡有呈遞國事或代遞美國大總理璽天德與中國 大皇帝之書即可隨時覲見其覲見之禮以及接見之地均須酌定合宜與該大員品位相當且始終相待美國交涉大員之禮儀均應按照平等之國所用者俾兩國彼此均不失體統其所享一切特權並優例及豁免利益亦按公例照相待最優之國所派之相等交涉大員一體接待享受至所有來往文函美員所發者應以英文作爲正義華員所發者應以漢文作爲正義 第二款 現因中國可派領事官員駐劄美國各地方其所享分位職權並優例及豁免利益均與別國駐美領事官員一律是以美國可按本國利益情形之所宜酌

派領事官員前往駐劄中國已開或日後開爲外國人民居住及通商各地方此等領事官遇有事故應以平行之禮互敬之道隨事酌情或會晤或行文可直與該領事官員職守所及之地方官相商辦理凡華官遇此等官員均須以合宜之禮相待至所享分位職權及優例豁免之事並裁判管轄本國人之權應與現在或日後中國施諸最優待之國相等官員者無異此國官員如被彼國官員有侮慢欺藐等情可將委曲情由稟報各該管上司務使澈底根究秉公辦理彼此所派領事官員亦不得率任意性致與駐劄之官員動多牴牾美國領事按例委派到中國各通商處之日應由美國駐京大臣知照外務部即由外務部按照公例認許該領事並准其辦事 第三款 美國人民准在中國已開及日後所開爲外國人民居住通商各口岸或通商地方往來居住辦理工各業製造等事以及他項合例事業且在各該處已定及將來所定爲外國人民居住合宜地界之內均准賃買房屋行棧等並租賃或承租地基自行建造美國人民身家財產所享之一切利益應與現在或日後給與最優待之國之人民無異 第四款 中國認悉現在於轉運時紛紛徵抽貨物之稅捐其中以釐金爲甚難免阻滯貨物不能流通勢必傷害貿易之利是以允願將通國轉運向抽之釐金以及各項行貨稅捐一概裁去並將向有徵收此項行貨稅捐之局卡一併裁撤不得另行設立局卡以徵抽行貨稅捐中美兩國彼此訂明所有徵收行貨

稅捐之局卡裁撤後不得改名或藉詞將此項局卡復行設立美國允許美商運進之洋貨及運出外洋或運往通商他口之土貨除照當時稅則應納正稅外加完一稅以爲補償中美兩國彼此訂明進口洋貨所加抽之稅不得過於中國與各國光緒二十七年七月二十五日即西歷一千九百零一年九月七號簽押之和議條約所定之進口正稅一倍半之數此項進口正稅及加添之稅一經完清其洋貨無論在華人之手或在洋商之手亦無論原件或分裝均得全免重徵各項稅捐以及查驗或留難情事至出口土貨所納稅之總數連出口正稅在內不得逾值百抽七五之數本款所載各節毫無干礙中國主權徵抽他等稅項之意祇須不與此款有所違背中美兩國心存以上各節爲宗旨故允願辦法如下中國允將十九省及東三省陸路鐵路及水道所設徵收行貨釐捐及類似行貨釐捐之各項局卡概予裁撤於本款照行之時不得復設凡有在沿海及設有新關之通商處所並在十九省及東三省中國沿陸之邊界現有各常關不在此列凡有新關之地方或日後新關不論設在何處均可設立常關及沿海沿陸邊界不論何處亦可一併安設美國允願洋貨於進口時除按照光緒二十七年所訂和約內載進口貨稅增至切實值百抽五外再加一額外稅照和約所定之稅加一倍半之數以抵裁撤釐金並行貨別項稅捐及洋貨各項稅捐並酬此款所載各項整頓之事中國可以將現在出洋土貨稅則從新修改以值

百切實抽五之例爲準凡能改者卽當定爲各該貨按色應完稅銀幾何惟如欲加抽須先六箇月預行通知方可現行稅則有逾估價值百抽五之數者亦須裁減無逾但因裁撤釐金及內地各項行貨稅捐之故所有土貨販運出洋或由通商此口轉運通商彼口除出口正稅外可在起運處或於出口時加抽當時出口正稅之一半以爲抵補凡洋貨與土貨相類者完納進口正稅及所加之稅後該口新關若據貨主請領卽應逐包發給該貨已經完清各該稅項之憑單免至在內地有爭執之虞凡民船運至通商口岸之土貨將在本地銷售者無論貨主是何國之人只應報明常關以便照中國政府稅項章程辦理凡用機器紡成之棉紗及織成之棉布無論係洋商在通商口岸或係華商在中國各處紡織者所應抽稅項均須一律無異惟各該機器廠製成之貨物於完稅時所用之棉花若係外洋運來者應將已完進口正稅全數及進口加稅三分之二發還所用者若係土產棉花須將已徵之各項稅銀全數一併發還其出口正稅出口加稅復進口半稅概行豁免凡別項貨物與洋貨相同在中國用機器造成者亦須按照以上章程辦法辦理由各省督撫自行在新關人員中選定一人或數人商明總稅務司由該督撫派赴常關當差爲監察常關之辦法凡有不合例之事一經美國人民告發卽由中國派相當官員一名會同美國官員一名及新關人員一名彼此職位相等查辦其事如經該人員查出實有留難受賄各情須

由新關賠還舞弊之員應責成該省大吏從嚴參辦開去其缺儘查出實係瑣瀆或被誣原告應罰還查辦一切費用此約一經兩國批准互換並與中國有約之各國允照本款各節後則會定此款舉行之日期即應明降 諭旨用膳黃布告於眾通傳徧國旨明將向有之各項釐金及行貨稅捐全撤並將徵抽此項稅捐之局卡及徵收內地各項洋貨稅捐盡行裁除其徵抽進口洋貨出口土貨之加稅及本款所載他等更改稅項暨整頓稅項之事須一併同時舉行所降 上諭亦須載明如有背此約文詞意之員即責成該省大吏從嚴參辦開去其缺 第五款 美國人民在中國輸納之進口貨物稅則須載錄於此約附表之內作為此約全體之一分如有修改之處祇可按照本約第四款所載或照中美兩國彼此日後所定辦理但訂明美國人民無論何時輸納稅項較之最優待之國之人民所輸納者不得加重或另徵又中國人民運貨進美境者所納之稅不得較重於最優待之國之人民所納者 第六款 中國允許美國人民在中國各通商口岸將該管官核准之棧作為關棧以便屯積合例貨物及拆包改裝或預備轉運惟該棧須遵中國為保護稅課起見隨時所定之關棧專章輸納公道規費至此項規費應納若干按棧離關遠近屯何貨物並工作早晚酌情核定 第七款 中國應知振興礦務於國有益且應招徠華洋資本興辦礦業故允自簽押此約之日起於一年內自行將美國連他國現行礦務章程迅速



認真考究採擇其中所有與中國相宜者將中國現行之礦務章程從新修改妥定以期一面振興中國人民之利益於中國主權毫無妨礙一面於招致外洋資財無礙且比較諸國通行章程於礦商亦不致有虧美國人民若遵守中國國家所定爲中外人民之開礦及租礦地輪納稅項各規條章程並按照請領執照內載明礦務所應辦之事可照准美國人民在中國地方開辦礦務及礦務內所應辦之事至美國人民因辦理礦務居住之事應遵守中美彼此曾定之章程辦理凡於此項礦務新章頒行後始准開礦者均須照新章辦理 第八款 還稅之存票須自美國商人稟請之日起如查係應領者限於二十一日之內發給此等存票可用在發給之新關按所載銀數除船鈔一項外以抵各項貨稅至洋貨入口後三年之內轉運外洋凡執持此等存票者即准任便向發給之新關按全數領取現銀償還存票之人欲圖混騙一經新關查出照美國天津條約第二十一款所載懲罰影射夾帶情事之辦法辦理該貨若已運出中國界外則應由本國領事將犯事人罰一合宜款項其所罰之銀送交中國查收 第九款 無論何國人民美國允許其在美國境內保護獨用合例商標如該國與美國立約亦允照保護美國人民之商標中國今欲中國人民在美國境內得獲保護商標之利益是以允在中國境內美國人民行鋪及公司有合例商標實在美國已註冊或在中國已行或註冊後即欲在中國行用者中國政府准其

獨用實力保護凡美國人民之商標在中國所設之註冊局所由中國官員查察後經美國官員繳納公道規費並遵守所定公平章程中國政府允由中國該管官員出示禁止中國通國人民犯用或冒用或射用或故意行銷冒仿商標之貨物所出禁示應作為律例 第十款 美國政府允許中國人民將其創製之物在美國註冊發給執照以保自執自用之利權中國政府今亦允將來設立專管創製衙門俟該專管衙門既設並定有創製專律之後凡有在中國合例售賣之創製各物已經美國給以執照者若不犯中國人民所先出之創製可由美國人民繳納規費後即給以專照保護并以所定年數為限與所給中國人民之專照一律無異 第十一款 無論何國若以所給本國人民版權之利益一律施諸美國人民者美國政府亦允將美國版權律例之利益給與該國之人民中國政府今欲中國人民在美國境內得獲版權之利益是以允許凡專備為中國人民所用之書籍地圖印件鐫件者或譯成華文之書籍係經美國人民所著作或為美國人民之物業者由中國政府援照所允保護商標之辦法及章程極力保護十年以註冊之日為始俾其在中國境內有印售此等書籍地圖印件或譯本之專利除以上所指明各書籍地圖等件不准照樣翻印外其餘均不得享此版權之利益又彼此言明不論美國人所著何項書籍地圖可聽華人在便自行編譯華文刊印售賣凡美國人民或中國人民為書籍報紙等

件之主筆或業主或發售之人如各該件有礙中國治安者不得以此款邀免應各按律例懲辦 第十

二款 中國政府既於一千八百九十八年將船艘可以行駛之內港開為特行註冊之一切華洋輪船行駛貿易以便載運搭客及合例貨物美國人民行銷公司均可經營此項貿易其所享利益應與給予他國人民者相同嗣後無論何時或中國或美國如欲將當時內港行輪各章程再行修改視為有益之舉應由中國查看所擬修改之處果為貿易所必需且於中國有利則由中國政府應允和平採酌辦理中國政府應允俟此約批准互換後將盛京省之奉天府又盛京省之安東縣二處地方由中國自行開埠通商此二處通商場訂定外國人公共居住合宜地界並一切章程將來由中美兩國政府會同商定

第十三款 中國允願設法立定國家一律之國幣即以此定為合例之國幣將來中美兩國人民應在中國境內遵用以完納各項稅課及付一切用款惟彼此商明凡納關稅仍以關平核計為準 第十

四款 耶穌天主兩等基督教宗旨原為勸人行善凡欲人施諸己者亦必如是施於人所有安分習教傳教人等均不得因奉教致受欺侮凌虐凡有遵照教規無論華美人民安分守教傳教者毋得因此稍被騷擾華民自願奉基督教毫無阻止惟入教與未入教之華民均是中國子民自應一體遵守中國律例敬重官長和翁相處凡入教者於未入教以前或入教後如有犯法不得因身已入教遂免追究凡華

民應納各項例定捐稅入教者亦不得免納惟抽捐爲酬神賽會等舉起見而與基督教相違背者不得  
向入教之民抽取 教士應不得干預中國官員治理華民之權中國官員亦不得歧視入教不入教者  
須照律秉公辦理使兩等人民相安度日美國教會准在中國各處租賃及承租房屋地基作爲教會公  
產以備傳教之用俟地方官查明地契妥當蓋印後該教士方能自行建造合宜房屋以行營事 第十  
五款 中國政府深欲整頓本國律例以期與各西國律例改同一律美國允願盡力協助以成此舉一  
俟查悉中國律例情形及其審斷辦法並一切相關事宜皆臻妥善美國卽允棄其治外法權 第十六  
款 美國茲允中國禁止莫啡鴉及刺入肌膚莫啡鴉之各針進口除爲醫治所必需者於進口時照則  
納稅應遵中國爲防有不因醫治使用起見所自定章程辦理不在此禁例此外無論由何國何地運來  
者均應一律禁止毫無歧視中國亦允禁止國內之銷戶製煉莫啡鴉或製造此項之針以杜隱患 第  
十七款 中美兩國彼此訂明兩國所立各約章如於一千九百年正月一號尙行者現仍施行至其爲  
現立之約或中美兩國別立之約所更改者不在此列現訂之條約須施行十年換約之日起直至下  
文所載續修改定之日爲止兩國又訂明或中國或美國在十年限期未滿以前均可請將現約所載之  
稅則及各款修改備十年期滿之前尙未照請修改則由該十年限期已滿之日起算續行十年以後均

照此限辦理 現訂之條約及附件三件其漢英文均經詳細校對惟嗣後如有文詞辯論之處應以英文作為正義 本約及附件三件畫押後須按照中美兩國之制度恭候 御筆批准在於美京華盛頓城一年限內會晤互換以昭信守本約立定由兩國特派大臣在中國江蘇省之上海將本約漢英文各二分畫押蓋印○商約大臣呂海寰盛宣懷伍廷芳與日本商約大臣日置益總領事小田切萬壽之助在上海議定通商行船條約十三款又續議內港行輪修補章程十條其文曰 大清國 大皇帝陛下大日本國大皇帝陛下為將光緒二十七年七月二十五日即明治三十四年九月初七日在北京簽定議定條款第十一條所定之事實辦見效起見商定通商行船條約續約以期中日兩國通商事宜緣此簡易振興是以 大清國 大皇帝陛下特派 欽差辦理商約事務大臣工部尚書呂海寰 欽差辦理商約事務大臣太子少保前工部左侍郎盛宣懷 欽差辦理商約事務大臣商部左侍郎伍廷芳大日本國大皇帝陛下特派欽差全權辦理商約事務大臣公使館頭等參贊官從五位勳五等日置益欽差全權辦理商約事務大臣總領事正六位勳五等小田切萬壽之助為全權大臣各將所奉全權文憑校閱俱屬妥當會同議定各條開列於左 第一款 中國現因釐革財政擬欲照徵海陸各關所過百貨之正稅外另添加稅以酌補因全行裁釐所紓之款日本國政府允認按照中國徵收出產銷場出廠

以及土鹽斤等稅亦悉照各國與中國商定辦法無稍歧異並不得因此日本之商務權利權假他國商務權利權致有軒輊之虞 第二款 中國 國家允日本輪船業主自行出貨在長江宜昌至重慶一帶水道施設批上溯溯之件因關係四川兩湖地方百姓應聽候海關核准後始行安設無論民船輪船均可任便聽用但所設之件不得阻礙水道或阻礙民船暢行或阻礙江邊陸路行人所有一切辦法仍須遵照海關議定專章辦理 第三款 中國 國家允能走內港之日本各埠輪船在海關報明由通商口岸往來報明之內港地方貿易應悉照所定正續各章程辦理 第四款 中國人民與日本臣民爲辦正經事業合股經營或合辦公司應照其合同章程損益公任並須照其自認合同章程辦理並願按日本公堂解釋該合同章程之辦法儻不照辦致被控告中國公堂應即飭令中國人民將其分內當爲之事照合同章程辦理日本臣民與中國人民合股經營或合辦公司亦應照其合同章程損益公任儻有不守合同章程分內當爲之事日本公堂亦須飭令一律辦理 第五款 中國 國家允定一章程以防中國人民冒用日本臣民所執掛號商牌有礙利益所有章程必須切實照行日本臣民特爲中國備用起見以中國語文著作書籍以及地圖海圖執有印書之權亦允由中國 國家定一章程一律保護以免利益受虧中國 國家允設立註冊局所凡外國商牌並印書之權請由中國 國家保護

者須遵照將來中國所定之保護商牌及印書之權各章程在該局所註冊日本國國家亦允保護中國人民按照日本律例註冊之商牌及印書之權以免在日本冒用之弊凡日本臣民或中國人民爲書籍報紙等件之主筆或業主或發售之人如各該件有礙中國治安者不得以此款邀免應各按律例懲辦

第六款 中國 國家允願自行從速改定一律通用之國幣將全國貨幣俱歸劃一卽以此爲合例之國幣將來中日兩國人民卽在中國境內遵用以完納各項稅課及別項往來用款毫無窒礙惟彼此商明凡納關稅仍以關平核計爲准 第七款 中國因各省市肆商民所用度量權衡參差不一並不遵照部定程式於中外商民貿易不無窒礙應由各省督撫自行體察時勢情形會同商定劃一程式各省官民出入一律無異奏明辦理先從通商口岸辦起以漸推廣內地惟將來新定之度量權衡與現行之度量權衡有所參差或補或減應照數核算以昭平允 第八款 光緒二十四年五月七月先後所定內港行輪章程間有未便是以中國允將此章程從新修補附載此約惟此章程應按照遵行直至日後彼此允願爲止 第九款 中日兩國現存各條約及兩國約定事項未經因立本條約更改或廢除者仍舊照行不違茲特聲明且大日本國政府官員臣民通商行船轉運工藝以及所有一切財產應享大清國 大皇帝陛下及政府各省或地方各官府允與別國政府官員臣民通商行船轉運工藝以

及財產之一切優例豁免及利益無論其現已允與或將來允與一體均享完全無缺中國官員工商人  
民之在日本者日本國政府亦必按照律法章程極力通融優待 第十款 現在兩國議定如駐紮直  
隸省之各國兵隊暨各國護館兵隊一律撤退後中國即當在北京自開通商場其詳細章程臨時商酌  
訂定中國允願俟本日所訂畫押之中日通商行船條約續約批准互換後六箇月以內將湖南省之長  
沙府開作通商口岸與已開各通商口岸無異各國人民在該通商口岸居住者須遵守該處工部局及  
巡捕章程與居住各該處之華民無異非得華官允准不能在該通商口岸之界內自設工部局及巡捕  
中國政府應允俟此約批准互換後將盛京省之奉天府又盛京省之大東溝兩處地方由中國自行開  
埠通商此兩處通商場訂定外國人公共居住合宜地界並一切章程將來由中日兩國政府會同商定  
第十一款 中國深欲整頓本國律例以期與東西各國律例改同一律日本國允願盡力協助以成  
此舉一俟查悉中國律例情形及其審斷辦法及一切相關事宜皆臻妥善日本國即允鑒其治外法權  
第十二款 本條約繕就漢文日本文英文署名爲定惟爲防以後有所辯論起見兩國全權大臣訂  
明如將來漢文與日本文有參差不符均以英文爲準 第十三款 本條約應奉 大清國 大皇帝  
陛下大日本國大皇帝陛下批准既經批准後在北京迅速互換其互換日期由本日署名起至遲不逾



大節月爲此兩國全權大臣署名蓋印以昭信守○庚午諭軍機大臣等外務部呈遞魏光燾電據稱查有上海創立愛國會社招集不逞之徒倡演革命諸邪說已飭查禁密拏等語朝廷銳意興學方期造就通才儲爲國用乃近來各省學生潛心肄業者固不乏人而沾染習氣肆行無忌者正復不免似此猖狂悖謬形同叛逆竊爲風俗人心之害蓋沿海沿江各督撫務將此等敗類嚴密查拏隨時懲辦所有學堂條規併著督飭認真整頓力挽澆風以期經正民興勿入歧途是爲至要○辛未夏時奏臣伏查江西前奉諭旨飭立學堂機經前撫臣李興銳護理撫臣柯逢時釐訂章程就省城豫章書院改修學堂肄業生徒約二百名此外仍留經訓書院以備謀士先後興辦具有規模臣接署撫篆後悉心考察竊思教法因時而制宜大義終古而無變譬之置表以求影未有表正而影斜凡謂學堂之流弊宜防者皆未爲知本之論也臣愚但以爲當求表正而已正表之法必以經訓爲宗而以中西諸科學術爲輔大本既立乃有實用可期惟立法本難得師尤不易伏見湖南湘潭在籍舉人王闓運爲學有本守道不變雖居橫議滔天之日常有人倫砥柱之思所著詩補箋周官侯禮記箋紹已絕之微言拒方張之邪說守先待後自循不移迹其生平教授丁寶楨聘主學經者八年彭玉麟延教船山者十歲督誘不倦矩度嚴然至今湘蜀學人皆能拒非法之言明居正之義未始非闓運昌明經學之力有以漸漬乎人心也擬即備禮延請

爲江西學堂總教習並中西諸科學術全省中小學堂事務令綜核損益施行庶若網之在綱必有條而不紊抑聞價章在下風行自上古有加禮一人而天下知勸者擬懇 天恩念正學之將微闡幽光於未發可否將王闈運學有本原深明大義之處 特旨褒揚以風天下出自 宸斷非臣所敢擅請 上諭夏時奏開辦省會學堂擬聘名師以端學術一摺湖南舉人王闈運昌明經術學有本原力拒邪說深明大義著傳旨嘉獎准卽聘充江西學堂總教習以維正學餘著照所議辦理○陳燮能等奏查蘆漢鐵路係代借比國公司洋款造辦前因豫鄂幹路還款保全枝路利益臣宣懷於光緒二十五年十月奏請將開封河南兩府枝路統歸總公司籌款接造欽奉 硃批著照所請該衙門知道欽此欽遵在案先據比國公司代理人盧法爾函請承辦當經派員伴護勘測大概旋因拳匪事起暫行停議去冬盧法爾來滬重申前請並承准外務部咨催辦理自應從速興辦查蘆漢鐵路在滎澤左近渡河該處東至開封府約一百七十里西至河南府約二百五十里現由盧法爾估計應借工款一百萬鎊合法金二千五百萬佛郎克議明利息期限悉照蘆漢章程俟合同簽定後九箇月內開辦所有議訂合同各條飭由總公司法文參贊候選道柯鴻年等與盧法爾數月磋磨並經 臣宣懷逐條斟酌審照蘆漢合同量爲刪汰閏五月間臣張能入都過滬互相商榷復經函呈外務部詳加增改旋准電覆酌添二節計訂定細目二十九條

又行車合同一條要以保持權利不令旁生枝節爲斷此次所訂合同大致以蘆漢幹路辦法爲基址而酌量增刪鉤勒較爲嚴緊除咨呈外務部外理合將所擬比國公司合同底稿繕具清單恭呈 御覽俟奉 旨批准再行簽印開辦得 旨外務部駁議具奏單二件併發○壬申諭軍機大臣等有人奏委員舞弊請旨飭查一摺著袁世凱派委委員澈底根究毋任寬抑原摺著鈔給閱看將此諭令知之○授敬信爲大學士裕德協辦大學士○調世續爲吏部尚書榮慶爲禮部尚書奎俊爲刑部尚書○癸酉諭本日御史王乃微奏參樞臣祖庇一摺御史係得風聞言事然必確有憑據方可登之奏牘王之春蘇元春辦理廣西軍務先後貽誤降旨將王之春革職蘇元春交刑部治罪皆出自宸斷非樞臣所能擅請朝廷賞罰自有權衡並無軒輊於其間至謂湯壽潛爲王文韶姻親希賢爲奕劻姻親各有私函屬託岑春煊該署督卽有電奏兩員留辦軍務奉旨著不准行等語該署督並無此奏王乃微輒以臆度之詞登之彈章殊屬非是姑念時事艱難朝廷虛己求言從寬免究王乃微著傳旨嚴行申飭嗣後言官奏事有關軍國重大事務當據實直陳不得以臆度無據之詞率行入奏以副朝廷實事求是之至意○調溥興爲理藩院尚書○以軍機處繕修清字檔冊成子內閣侍讀鍾佩等升敘有差○甲戌調松壽爲鑲藍旗滿洲副都統以塔克什爲鑲紅旗蒙古副都統○以溥綱爲工部右侍郎○丙子諭軍機大臣等有人奏蒙古

游牧開辦鹽場請飭行查等語著袁世凱查明情形據實覆奏原摺著鈔給閱看將此諭令知之○授崇禮爲文淵閣大學士孫家鼐爲東閣大學士敬信爲體仁閣大學士○丁丑 慈禧端佑康頤昭豫莊誠壽恭欽獻崇熙皇太后 皇上御仁壽殿德國使臣穆默帶領膠州德租界巡撫沛祿法國使臣呂班帶領水師提督伯祿覲見○戊寅以蘇倫元爲雲南昭通鎮總兵徐印川爲貴州古州鎮總兵○貽穀等奏奴才等籌辦察哈爾左右兩翼各旗雜務曾經先後奏明給予各蒙旗官弁兵丁隨缺地畝及各蘇木公共牧地等情奉 旨允准在案惟此項缺地牧地如何分別擬留前以未據該旗將各蘇木官弁兵丁詳數及有無未墾之地大概數目呈報到齊未能遽行核辦現兩翼雜務各局清丈將竣約知地數並已查明每旗大小蘇木若干蘇木官兵若干呈報前來自應遵案將缺地牧地詳定章程分飭撥留查察哈爾蒙地附近直管遵廳各旗私放得租久已計不在牧特蒙情雖變蒙俗不殊芻牧之求固宜早爲之所牧地一項擬每整蘇木酌留十二頃半蘇木及半中之半蘇木減撥一半計每蘇木六頃牧地與墾種之地不同不必區別肥瘠亦不必拘定一處但水草相宜或與蒙營相近截長補短儘可照擬撥給如木蘇木地皆已墾盡或不敷撥給之數卽於左右附近各蘇木另行劃補以免向隅如此撥留足敷牧放並擬俟兩翼地畝丈竣時如有苦寒磽确不堪耕種之區在何旗界內擬卽留給何旗此酌留公共牧地之辦法

也其隨缺地一項查察哈爾官兵等俸餉無多日艱一日此後地歸官辦無復自私自利之謀若不恤身家寬爲籌計將使資生無術難免觖望之心擬仿照吉林烏魯木齊奏撥缺地成案酌量稍加總管每員給地八百畝正參領每員給地六百畝副參領每員給地五百畝整蘇木之佐領每員給地四百畝半蘇木及半中之半蘇木其佐領每員均給地三百畝滿蒙理刑官每員給地二百畝總管下及整蘇木之前鋒校護軍校每員給地二百五十畝筆帖式及額設捕盜官每員給地二百五十畝半蘇木及半中之半蘇木其前鋒校護軍校每員給地二百畝筆帖式及額設捕盜官每員給地一百五十畝至各蘇木額設兵丁有大小錢糧之別今撥留缺地應分別辦理馬兵每名擬給地百畝步兵每名擬給地六十畝各捕盜兵如係額設每名亦給地六十畝此酌留缺地之數若撥留辦法一須統劑其半一須預防其弊各蘇木官兵缺地應各由本蘇木劃留惟內有地已私放淨盡無地可撥者若遽由他蘇木撥補是有餘地之蘇木反因撥地於人致官局少放地若干卽該佐亦少得四分經費之利而無地者既早獲盜賣之價又同得養贖之田等益齊觀殊非公允不得不臚予裁減微示之罰此項無地可撥之蘇木擬照現定應從各項缺地數目減半撥補並須俟有地之原蘇木先將本佐官兵缺牧撥留完竣再以餘地分撥免致喧賓奪主之嫌如備撥之地仍有不敷則擬由升科之四盟另租項下以租抵補每畝撥若干照正賦一分

四釐核計若地雖未及放盡而所剩之地不足現定缺地之數尙缺若干亦於另租項下折米抵補如尙缺十頃補以五頃之租餘可類推於薄罰之中仍寓體恤之意此酌劑其平之辦法也蒙人惟利是圖罔知後顧此次所撥各項缺地係爲該官兵等永資養贍將來生計全恃乎此若不預爲之防難保該官兵等不仍前私賣擬自撥定之後由奴才奎順衙門查照立案並飭由各該旗將撥留數目詳造細冊送由奴才貽穀鈐蓋關防發存各旗遇有官兵選調將此缺地算入交代不得稍有含混至缺地撥給官兵或自行耕種或招佃分收悉聽其便惟不允私行變賣無論是官是兵如有營私盜賣盜典及假託承租不賣之賣致令地非其有一經奴才奎順衙門查出或別經發覺官則參處兵則革除其私賣之人亦與私賣者一併懲辦仍追奪原地歸旗如此嚴立防閑庶可永遠遵守此預防其弊之辦法也以上牧地缺地無非惠恤蒙旗應請 旨准免其押荒升科以廣 皇仁而紓蒙困至世職一項承襲多寡靡定原不以缺論未便一律給以業田擬俟懇務辦清於該各旗應得四分辦公經費內如有餘儲每旗提銀千兩由聖局移交就近地方官發商生息按年以所得息銀由地方官查取該旗世職員名數目並孤寡蒙民幾戶均勻給予俾資津貼卽人數加多亦祇均分此項他如各廟香火地畝須確查釐有頃畝若干有無別項轉輾由官局理清准其照章營業惟勘丈動需經費擬令照章繳納押荒一半以濟公用至升科擬請

寬免俾其以常年租項藉資養贍齊其整不易其俗亦輯安蒙衆之一事也其餘應須劃留之地如考驗  
場軍政操場各衙署四圍空間均擬察度情形一併預行劃撥得 旨著照所請該衙門知道片併發○  
貽穀奏開墾所以實邊安邊必先置吏察哈爾兩翼八旗所屬地連蒙古而左翼尤密邇 畿輔屏蔽北  
門當振興邊務之時尤應預爲因地制宜之計左翼原設三廳曰張家口曰獨石口曰多倫諾爾多廳自  
駐口外張獨兩廳則借駐口內之萬全縣赤城縣境計該三廳所轄向祇招墾升科之地附近何廳卽歸  
何廳治理從前地土荒蕪人煙稀少事尙簡而易理然一遇命盜詞訟各案輒待拘質於數百里外不惟  
駐口內之張獨兩廳大有鞭長莫及之勢卽多廳亦以地段袤延不無顧此失彼之慮況現在左翼各地  
業經放墾過半計縱橫千有餘里其間漢蒙錯處民教雜居輻輳事件日多一日若再將新墾之地分附  
三廳而張獨兩廳仍駐口內幅輳既廣周顧愈難口外商戶半多四方不逞之徒霸佔強爭動輒械鬪兼  
以馬賊土匪出沒無常搶刦之案所在多有調兵往捕兵至則遠颺兵去則復聚官力不足其勢然也夫  
聚民以闢地設官以治民事本相宜而起自非移添廳治不足以規久遠而策治安現既墾地日廣戶口  
日繁保教輯安氓捕盜在在均關緊要奴才等體察情形似宜將原設張家口廳獨石口廳均移駐口  
外適中之地便民就治並宜於附近直管新界地方如大搭拉老虎山等處擇設一廳以控制西北又張

獨之間如閃電河均係衝要處所或再酌添一驛或設分防於吏治邊防實屬有裨下吏部議奏○庚辰  
賞給五城煮賑米石



東華續錄

光緒一百八十三

臣朱壽朋敬編

臣章圭璩恭校

九月辛巳朔諭商部奏請飭力行保商之政一摺中國自互市以來商務日甚現在設立商部正宜極力整頓相與維持惟中國商民平日與官場隔閡情誼未能遽孚而不肖官吏或且率舉抑勒甚至報關完稅多所需索商船驗放到處留難遇有詞訟不能速為斷結辦理不得其平以致商情不通諸多阻滯著各直省將軍督撫通飭所屬文武各官及局卡委員一律認真恤商持平辦理力除留難延擱各項積弊以順商情而維財政倘有不肖官吏仍前需索留難著隨時嚴查參辦勿稍徇縱○壬午兵部右侍郎文治因病乞休允之○賞給普濟堂功德林煮賑米石○癸未潘效蘇奏新省南北兩路改設增設各府廳州縣縣承經前撫臣饒應昉奏明經部議准奉 旨欽遵咨行到新臣到任後飭司委員勘分增設各處界址辦理就緒已將正佐各缺陸續揀員委署隨時奏咨在案所有應支官役廉費俸工以及增設廳縣各衙署壇廟倉廩監獄等項經費銀兩均應分別籌畫酌設數目值此款項奇絀尤必可省卽省只期足資辦公不敢稍事鋪張查疏勒莎車溫宿三直隸州改升知府三州吏目改升府經歷庫車直隸縣同知

改爲直隸州知州瑪喇巴什直隸廳通判改爲知州兩廳照廳改爲州吏目以上改設正佐十缺衙署壇廟倉廩監獄毋庸興修廉費俸工等項一概照舊亦毋庸增減莎車府屬新設蒲罕通判新設澤普縣現另案奏請改名皮山縣疏勒府屬新設伽師縣和闐州屬新設洛浦縣溫宿府屬舊城巡檢升設溫宿縣柯坪添設縣丞焉耆府屬布告爾巡檢改升輪臺縣卡克里克縣丞改升塔羌縣庫車直隸州屬新設沙爾縣阜康縣屬之潘木薩縣丞改升于遠縣吐魯番縣屬展巡檢改升鄯善縣共計九縣各添設典史一員以上添設正佐二十缺新衙署經費正署酌發銀三千二百兩佐署酌發銀五百兩監獄酌發銀三百兩總共以四千兩爲度其舊有縣丞巡檢衙門之處或改作正署或改作佐署減去銀五百兩此係酌定大數以期辦理歸於畫一仍飭令切實撙節統由各該委署人員核實估報興工不准浮冒分釐一俟工竣卽委勘結報造銷歸舊後項下開支至應修倉廩須就糧數多寡估報壇廟須就地方情形籌辦均由地方官酌定具稟請示飭辦補單通判應支官役廉費俸工仿照霍爾果能通判章程開支惟該處並無稅釐又與英俄接壤常多交涉事件擬再加公費銀四百兩添設九縣應支官役廉費俸工銀兩地面歸北路鎮道屬者卽照阜康縣章程開支歸南路阿克蘇喀什噶爾兩道屬者卽照拜城縣章程開支其應支公費銀兩除鎮道伊塔道各屬仍照舊支發外阿克蘇喀什噶爾兩道各屬額支公費銀七百

兩有另加增公費銀六百兩亦有未加增者擬將未加者仍支原額凡有加增者各減去銀二百兩新設之缺支額定公費銀七百兩外又加增銀四百兩溫宿縣屬新設柯坪縣丞呼圖壁巡檢改升縣丞應支官役廩費俸工仿照前滿木薩縣丞章程開支以上總共歲支銀四萬五千六百九十九兩零除裁改各原缺抵支銀四千二百九十餘兩尚須添支銀四萬一千餘兩作為前項動支不另請款以符原案據署新疆布政使李滋森署鎮迪道兼按察使銜慶秀會詳請奏前來臣覆核無異下部知之○乙酉追子故鹽運使李昭慶戰績交國史館立傳並附祀山東大學士李鴻章祠○丙戌諭軍機大臣等戶部侍郎戴鴻慈奏廣東吏治營伍稍弊甚深請飭疆臣認真整頓一摺察吏治兵尤為今日之急務非認真整頓不足以除盜賊而安民生廣東吏治營伍之壞較他省為尤甚著岑春煊張人駿按照所陳各節切實籌辦力除弊端嚴申儆戒如有不肖官弁隨時奏參嚴辦毋得瞻徇以靖地方原摺著鈔給閱看將此諭令知之○丁亥 慈禧端佑康頤昭豫莊誠壽恭欽獻崇熙皇太后懿旨禮部奏為禮部奏為壽禮節一摺十月初十日萬壽在排雲殿受賀停止筵宴其在外之公主福晉命婦著照例行禮餘依議○丁振鐸奏滇省訓練團哨曾經前撫臣李經羲將章程鈔單分別奏咨於光緒二十八年五月二十四日奉 硃批該部知道欽此欽遵轉行遵照在案查原章係以三月為一班合兩年半練足十班周而復始是每年既練四班不惟

農忙不能停止而薪餉益爲不贖上年剿辦游匪次第增設廣西等處團營餉項無出不能不拮注鹽捐本年臨安事起連近各州縣均添調團兵藉資防守而現在粵游未靖各處團營不特不能遽裁且時有增添之處計惟將團哨酌量變通以期兩有神益臣等伏維團練本古者鄉遂制軍之法亦泰西民盡兵籍之規有應盡之責卽有應休之時不定年限不明等級則生計有礙暮氣易乘殊非持久之道今擬分團練爲三等一曰正戰團配以八成鎗礮主本境鄰境前敵殺賊之事一曰備戰團配以六成鎗礮主本境鄰境應援設伏之事一曰巡警團配以三成鎗礮主本境偵緝巡察之事現在各屬練至五班者已屬不少卽開操最遲者本年底亦可練足五班此後卽自甲辰年起改爲每年訓練八箇月以三箇月練一新班已練之舊班五班各帶練一月俾技藝皆臻純熟農時不致曠廢合五年爲一等按年練一新班退一舊班正退爲備備退爲巡巡退爲民共十五年而三等事卽不在部勒之列然而舊班既各帶練一月後彼此若不顧問仍嫌不免荒疏則復訂帶操之法將備戰團丁輪調帶操二日除甲辰年五班全行帶練毋庸帶操外乙巳年起調備戰之團帶操二日五年後頭班退爲巡警六班退爲備戰巡警則毋庸帶操仍備足五班爲止嗣後每屬卽永有三營之衆合通省已練之丁可得三百四十五營民兵十萬有奇是每屬已隱儲三營之兵而常年且不及一營之餉更嚴其賞罰以昭激勵待以禮數使異齊民挑優等

者准拔補營弁予以出身數年之後民盡知兵遇有徵調毋須招募自強之圖實基於此第團保不合一則挑丁不免紛歧退伍亦無約束今擬照保甲成法先行清查煙戶十家爲牌十牌爲甲十甲爲保均有長十保爲團團有正另選團總一二人以總其成均由地方報名公推以公推在八成以上者爲合式所有丁壯咸造入冊以後挑丁卽按籍而稽各鄉各爲一哨庶相習相親不虞隔閡練畢退伍仍歸保甲巡警一營既專主偵緝巡察之事尤應以保甲爲重平時守望相助盜警協力緝捕並責成盤詰奸宄清查匪類以靖地方如此則三時無害士氣常新減練節制以處其常加練以通其變團保相輔而行尤爲有利無弊得 旨著卽切實辦理務收實效○庚寅外務部奏光緒二十九年八月二十日准軍機處鈔交河南巡撫陳夔龍督辦鐵路大臣盛宣懷會奏展道開封河南兩府枝路與比國公司議定合同一摺奉 硃批外務部核議具奏單二件併發欽此原奏內稱蘆漢鐵路係代借比國公司洋欸造辦前因預籌幹路還欸保全枝路利益事宜懷於光緒二十五年十月奏請將開封河南兩府枝路歸總公司籌款接造欽奉 硃批著照所請該衙門知道欽此欽遵在案先據比國公司代理人盧法爾函請承辦當經派員伴隨勘測大概旋因拳匪事起停議去冬盧法爾來滬重申前請並准外務部咨催辦理自應從速興辦查蘆漢幹路在滎澤左近渡河該處東至開封府約一百七十里西至河南府約二百五十里現

由盧法爾估計應借工款一百萬鎊約合法金二千五百萬佛郎充證明利息期限悉照蘆漢章程俟合同簽定後九箇月內開辦所有議訂合同各條飭由總公司法文參贊候選道柯鴻年等與盧法爾數月磋磨並經臣宣懷逐款斟酌照蘆漢合同量爲刪汰閏五月間臣鑾龍過滬互相商榷復經函呈外務部詳加增改訂細目二十九條又行車合同十條要以保持權利不令旁生枝節爲斷大致以蘆漢幹路辦法爲基址而鉤勒較爲嚴緊等因臣等查蘆漢分枝開封河南兩路既經盛宣懷奏蒙 俞允自應准其展造本年六月間盛宣懷先將合同底稿函送臣部酌核臣等詳加覆核其還本付息用人購器一切辦法均與蘆漢合同相符而意義較爲周密惟合同第二十三款內載倘日後中國 國家准由河南府接長至西安府督辦大臣可以應允先儘比公司按照本合同章程妥商議辦等語查二十五年十月盛宣懷原奏雖經聲明自洛以通秦隴應歸總公司籌款接造而此段枝路地勢綿長將來如議用華款自辦亦不可不留地步當令添敘倘中國 國家自行籌款或招集華商股本接展此路比國公司不能爭執又令於行車合同第九款添敘中國郵政局由此鐵路寄送各郵件應特備專車沿途各站皆須備給房屋以設郵局均照中國各鐵路通行章程辦理沿途並不得由承辦之國另設郵局等語以保權利現訂合同均已一一載明其餘各款蘆漢幹路既經照行應請准如所議辦理如蒙 俞允卽由臣部咨行

盛宣懷與比公司同簽押並咨行陳夔龍一體遵照得 旨如所議行○壬辰以戴昌為內閣學士○  
癸巳以辦理河工出力予河南布政使延祉等優敘有差○撫恤朝鮮遭風難民○乙未賞給王恕圖等  
處煮賑米石○丙申調那桐為外務部尚書會辦大臣○命榮慶為軍機大臣○調榮慶為戶部尚書以  
溥良為禮部尚書○命大學士王文韶管理戶部事務開去會辦外務部大臣○予山西介休縣烈婦陳  
蔡氏旌表○魏光燾等奏據浙江糧道陸襄鉞蘇松糧道羅嘉杰會詳稱江浙兩省徵辦漕白二糧歷屆  
由海運津向用剝船運至通倉每石例支耗米一升一合五勺名曰津剝食耗原以津貼南省運米折耗  
之用數十年率由請章船戶如有虧短卽以此項米石抵補自光緒二十六年南漕改用火車運京復用  
騾車運倉前由蘇松糧道擬請將隨運經剝等米全數留抵彌補火車騾車虧耗等情當經 上恩壽據情  
咨准戶部倉場督 臣核覆前項耗米應令隨正交倉另行按照由通運抵大通橋由橋運倉經紀車戶每  
石准給一升騾車耗米江浙一律火車不另給耗者蓋以合同訂明保險應無短少故也至光緒二十七  
年京倉接修鐵路經倉場督 臣檄行京沽辦運漕糧局委員江蘇候補知府鄧心茂浙江委員候補知府  
喻兆藩以今屆漕米由火車運運太平倉驗收計程較近一切與在通驗收由剝船到壩情事相同從前  
通驗並不開支耗米所有一切騾車耗米應令隨正交倉未便准其撥給等因自應遵辦以益公家乃試

辦車運已歷三屆雖經該道督率京沽局委員認真經理以冀無虧正供無如每屆運米串竄截數核計虧耗竟不能免每石或虧一升至三四升不等推原其故米自塘沽上棧裝載火車一經顛播便有壓碎澆漏之虞此火車之耗也鐵路合同訂明保險僅保意外之險如果米包不少即係米無虧短其米色中之如何暗耗並不過問又南漕到京後初用人夫搬運繼因驗米場路遠兼用騾車拉運計自卸火車入棧次早出棧搬上騾車至驗米場搬下反復數次裝卸上下顛簸袋繩難免鬆寬米粒不無拋漏此又人夫騾車搬運之耗也間有米色不純風節折耗更多總之陸運之米較之漕運一水可通者勞逸懸殊消耗尤甚運費有限米耗難籌思維至再擬請將例設津餉食耗米石免予隨正起運留抵車運虧耗以資彌補正供如再不敷山道自行設措不再稟請以示限制聯銜詳請奏咨前來臣等覆核無異下戶部議奏○丁酉諭岑春煊奏查明廣西優劣各員分別舉劾一摺署太平府知府候補知府吳徵釐署平樂府知府候補知府英霖調署南甯府知府全州知州彭言孝署百色屬同知東蘭州知州王鴻請調署貴縣知縣興安縣知縣賀源清署武緣縣知縣候補知縣劉壬瀾署永淳縣知縣候補州同顧立廷既據該署督臚陳政績均著傳旨嘉獎前署右江道候補道沈世培措置乖方諱飾貽禍前署潯州府知府候補知府蔣志持貪黷昏庸罔知表率署賓州知州興業縣知縣沈祥麟丁役訛索民怨沸騰前署柳州城縣知縣



試用知縣薛治縱容丁役罔恤民艱前署上林縣知縣恭城縣知縣孫焯縱庇丁役玩視民瘼前署來賓縣知縣候補知縣郁家珍妄擊無辜肆意虐民署龍州縣同知請補南寧府同知羅家勸辦事昏庸形同木偶前署恭城縣知縣候補知縣朱彥成縱役需索前辦綏遠軍營務處廣東候補知府李宗道狡詐貪婪激變軍心致有營勇逃潰之事同案之兼帶綏遠軍左營廣西候補知縣潘成秀駕馭失宜管帶綏遠軍左營分省補用知縣謝允中有意縱延慶遠協副將尙邦泰營伍廢弛慶遠協都司余銳光巧滑性成均著卽行革職永不敘用潯州協副將松秀疲軟無能著卽行革職柳州府知府趙淦彥辦理防剿諸多乖謬著勒令休致已革羅城縣知縣馬振江縱兵姦掠僅予革職不足蔽辜前代理雒容縣知縣試用府經歷劉華照前忻城土縣委員候補巡檢倪孝先誣良爲匪到處勒索均著卽行革職與馬振江一併發往新疆効力贖罪管帶熊宇營補用副將熊瑞清截獲匪擒婦女私售得財管帶忠字營補用都司蕭達庚縱兵騷擾均著卽行革職發往軍營効力贖罪前署慶遠府知府候補知府濮賢恆調度乖方管帶毅字右營浙江補用游擊黎天才管帶安勇中營補用守備鄭潤潮管帶蘇字營陝甘補用參將儲崑山剿匪不力均著卽行革職留營効力贖罪以觀後效另片奏署南寧府知府候補知府黃英采藉端需索民怨沸騰著卽行革職發往新疆効力贖罪餘著照所議辦理該部知道○以清銳爲左都御史○命戶部

尙書榮慶充政務處大臣○命外務部尙書那桐會同慶親王奕劻翟鴻璣辦理戶部財政處事務○岑春煊奏署廣西提督雲南臨元鎮總兵黃呈祥自接署提督以來於邊防事宜毫無整頓以至太平歸順等處游土各匪充斥蔓延初猶以蘇軍驕悍整頓本難卽其辦匪無功咎總由於王之春意在敷衍乃近准署廣西提督丁槐電稱黃呈祥交卸時曾扣發各營旗幟衣銀一千數百兩此外二十營之餉每月約共扣發銀七百兩有奇等語查黃呈祥身爲專閫大員值邊軍廢弛之餘匪黨縱橫之際不能認真整頓迭掃邊氛已屬辜恩溺職猶復營私侵餉罔顧時艱若不據實嚴參何以儆效尤何以飭營伍相應請旨將雲南臨元鎮總兵黃呈祥卽行革職永不敘用以爲侵餉者儆其扣發餉銀一欸亦經飭廣西營務處照數嚴追 上諭岑春煊奏參前署廣西提督雲南臨元鎮總兵黃呈祥營私侵餉等語黃呈祥卽行革職永不敘用○戊戌以墊岫爲理藩院右侍郎○調馬金敘爲江蘇淮揚鎮總兵以劉樹元爲雲南臨元鎮總兵○會辦廣西防務前貴州提督馮子材卒予祭葬建祠戰功事蹟交國史館立傳賞其孫馮承祥以郎中用○命大學士孫家鼐吏部尙書張百熙充政務處大臣○壬寅前禮部尙書廖壽恆卒予祭葬賜卹如例○癸卯錫良奏四川縣習每遇差吏出缺頂補者謂之頂參行賄者謂之參費因之俊擲公帑肆無顧忌是賄入私室而於公家求所償言之實堪痛恨身爲大吏方禁革之不暇豈有不自

修飭先蒙不潔以貽口實而長貪風乃四川布政使陳璠上年在臬司任內署理藩司適有頂參書吏索賄甚鉅該吏黃智周因負重債愁急自刎近日其妻黃李氏亦以債逼服毒殞命竄謂陳璠之子分省補用道陳大誥實主持之在陳璠知情故縱罔屬罪不容辭倘竟冥然罔覺亦屬理贖無用現值整頓庶務之時四川大省藩司重任以年老昏邁之人濫厠其間貽誤匪細奴才到任後以其精力衰頹辦公竭蹶諷以引退之議該員志殷報稱不敢圖安近更老病侵尋心神恍惚辦事每多顛倒錯亂萬難再爲遷就致滋叢脞乃遍告賓僚代爲婉勸均謂該員曾云待至明春始議歸計同人無從進言夫引年固有明義戀棧尙屬恆情設公事勉可支持奴才何忍不爲涵蓄惟目下諸務勢將停擱若聽推延必致全行廢廢且其子倚勢貪利荒謬絕倫去冬妄拿民婦鍾吳氏作爲廖觀音幾成大獄幸經前署督臣岑春煊督訊審釋遂卽畏罪遠避迨至岑春煊調任兩廣陳大誥又由上海挾妾回川沿途觀者如堵播爲笑談復招集婦女乘坐水師礮船招搖西上奴才由鄂入蜀沿途風聞殊爲詫異當飭川東道賀元彬確查稟覆相符陳大誥回川後懇恩其父半月間撤換營官幫帶十九員之多若謂陳璠整頓營務何不早爲振作乃至將卸譴督始行紛紛更易人言嘖嘖殆非無因奴才與陳璠在淞同官年餘極稱相得既不敢因私而廢公亦不敢姑息以爲愛第念陳璠宣力有年平日循謹去歲捕拿拳匪尙有微勞刻下實因年老精神

不能周到疏於防察合無仰懇 天恩俯賜四川布政使陳璘開缺原品休致以重地方陳璘之子二品銜分省補用道陳大誥應請 旨卽行革職以示懲儆 上諭錫良奏參四川布政使陳璘年力就衰僭用伊子道員陳大誥約束不嚴請旨懲處一摺陳璘著以原品休致陳大誥貪利招搖干預公事著卽行革職○以許涵度爲四川布政使調樊增祥爲四川按察使以李希杰爲浙江按察使○丁未汪鳳池奏近年以來中外保薦人材送部引 見者接踵而至其中固不乏出衆之材而才具平常濫登薦牘者亦復不少蓋由鑽謀之術久而愈工而中外大臣亦未免徇物市恩不復爲 國家顧惜名器致使 朝廷飢渴求賢之意轉爲巧宦夤緣干進之階臣竊痛之且工營求者多所越職卽安義命者愈益沈淪甚非所以勵人材而端士品也應請 明諭中外大臣保薦人材務須矢慎矢公不得仍前冒濫並請 飭下吏部將明保各員無論候選候補酌定班次與各班相間輪用無任一概佔先其有應繳捐免保舉及留省銀兩者應一律照章補繳方准輪選輪補以昭平允而杜取巧 上諭御史汪鳳池奏中外保薦人才冒濫甚多請加裁抑等語現在時事多艱朝廷求才若渴原則甄拔得人近來保薦各員固不乏可用之材而瞻徇情面濫登薦牘者亦復不免嗣後內外臣工務當核實薦舉汲引真才不得稍有冒濫以副朝廷實事求是之意至所稱明保各員無論候補候選酌定班次各節著吏部議奏○追予故河南河北鎮

總兵周萬順建祠戰功事蹟交國史館立傳○袁世凱奏查宣化府所屬十州縣及張家口獨石多倫諾爾三廳鹽務已經奏明官督商辦暫令每年包交課銀三萬兩並聲明都統衙門所收鹽釐循舊抽收其餘一切陋規花費概行裁革欽奉 硃批著照所請該衙門知道欽此遵經行司轉飭口北督銷局按照奏明辦法分別移行遵照在案茲據運司汪瑞高詳據局員稟稱移經張家口監督搜稽蒙鹽內有正稅詢其每年額徵若干稱係查照戶部則例口外鹽稅每石一兩五錢每年所收稅銀統歸任滿報部並無一定每鹽一石徵銀四分歲無定額所徵銀兩向俟一年期滿隨同雜稅於次年五月請咨解部其數歲約四百兩左右額徵落地稅銀一萬六千餘兩鹽稅即在其內各等情該司查得長蘆食鹽徵課之後經過關卡不再抽稅蒙鹽乃獨有進口稅則蓋因利源未闢口北鹽務從未整頓任聽私自販賣故併入百貨一律徵收現既奏定創辦督銷歸入蘆綱山商董包課行運酌定年額兼之近年察哈爾都統衙門抽釐加價重疊稽徵價已較前倍漲若再向監督衙門及多倫總繳稅不獨蘆綱例章未合並恐於民食商情多所關礙且原奏聲明惟都統衙門鹽釐照舊抽收其餘概行裁革嗣經戶部咨撥亦未指明前項鹽稅仍須照徵尙非稅額著重之歟既稱係載在則例自應奏請裁免以恤商艱又宣化延慶保安西寧懷來等五州縣每年應徵包課銀二千五百九十四兩四錢三分二釐原因各處向食蒙鹽並無額課故由

民間攤交今已官督商辦由局交課此次包課銀兩係屬重複應請一律裁免並開州縣額徵包課銀數  
清摺詳請具奏前來臣查長蘆引鹽徵課以後經過關卡例不重複口北鹽務既設局官督商辦由局交  
課所有張家口監督衙門向收鹽稅每石徵銀一錢五分多倫廳鹽稅每年約徵銀四百兩並宣化延慶  
保安西甯懷來五州縣每年應交包課銀二千五百九十四兩四錢三分二釐合無仰懇 天恩俯准自  
本年五月口北督銷設局以後交納前項鹽課包課一併裁免其多倫廳裁免鹽稅銀約四百兩係在該  
廳額徵落地稅銀一萬六千餘兩之內並請照數減解以昭平允下戶部知之○戊申諭載振奏參考取  
商部司員一摺現值時事艱難振興庶務堂司各員宜如何清白乃心砥礪廉隅以端治本茲據奏稱兵  
部候補主事龔心銘於考取記名之後竟敢冒昧餽送銀兩竊屬意存嘗試行止有虧龔心銘著即行革  
職載振據實奏參尙能破除情面嗣後如有此等情事均應著照此辦理以挽頹風○己酉諭軍機大臣  
等有人奏山東候補道朱鍾琪貪污性成素行浮蕩爲周馥所信任要差多歸兼領該道驕縱貪淫無所  
不至奉旨停罷雜稅仍復舉辦請飭嚴密確查等語著袁世凱按照所參各節認真查辦毋稍徇隱原片  
著鈔給閱看將此諭令知之○允廣東布政使丁體常開缺回籍○庚戌諭朕欽奉 慈禧端佑康頤昭  
豫莊誠壽恭欽獻崇熙皇太后懿旨中城御史賈秀等奏添設粥廠請賞米石一摺北城所屬掛甲屯新

設粥廠加恩著賞給粟米三百石由該御史祇領發交該處紳董煮粥散放以惠窮黎○以恩順爲兵部右侍郎○調胡湘林爲廣東布政使以張廷燦爲廣西布政使○是月荷蘭國新簡駐華使臣希特斯抵

任

冬十月辛亥朔時享 太廟 上親詣行禮○上御乾清宮和國使臣希特斯覲見○諭御史張元奇片奏商部尙書載振在餘園等處朋聚宴飲等語現在時事艱難朝廷宵旰憂勤無時或釋大小臣工自當戰兢惕厲各勤職守載振分屬宗支所管商部關係綦重宜如何奮勉謹慎一意奉公何心娛樂游譚其中應不止載振一人在載振尤當深加警惕有則改之無則加勉此外王公及大小臣工均當互相儆戒東身自愛勤供職業共濟時艱毋負朝廷諄諄誥誡之至意○載振等奏商務初基以提倡土貨爲第一要義故農工商三者各有相需爲用之理本求兼資源流斯暢上年正月間政務處議擬升任巡撫岑春煊奏請振興農工商業一摺欽奉 上諭農工各務著實成各督撫隨時認真興辦各就地方情形詳籌辦理並先設農務學堂以資講習等因欽此仰見 聖朝敦崇本務之至意臣等伏查中國地當溫帶風土清淑山林川澤之美自昔豔稱乃農政不修膏腴坐廢 國家屢下勸農之 詔而各省官吏奉行迄無成效者豈督率之無方抑亦由辦理之未得其道也辦理之法宜求實事入手之初既有二端一曰清

地畝綜計中國二十二省地大物博其間山地若干水地若干熟地若干荒地若干已墾而未成熟之地若干詢諸各省府廳州縣大抵悉魚鱗冊報輾轉不清致多隱匿亟宜令各該省將軍督撫通飭所屬編造地畝冊躬行履勘確實丈量將熟地列爲一冊官荒民荒地各列一冊並繪圖貼說彙報臣部備覈其各省從前封禁之山並應一律弛禁註入冊內一併咨報由臣部查明後設法提倡廣爲開墾惟地方官清丈之時務宜輕車減從不得任用差役致敢騷擾需索之弊如有劣紳土棍霸佔私墾情事尤應據實稟報從嚴懲辦一曰辨土性禹貢物土各貢所有迄於近世講求化學利用厚生於焉是賴譬如江浙之地宜於桑茶閩地宜於樟腦粵地宜於果品香木蜀地宜於竹木藥材利源所在不勝枚舉亟宜令各督撫通飭各州縣編造土性表將某地宜於某種某種宜於某用某地已經種植某地尙待試驗各列一表並附說略彙報臣部備覈一面實力勸導廣興藝植毋使地有遺力他若種樹之利各國重以專門之學應令各省督撫出示曉諭民間就土性所宜設法栽種十年之後氣象蕃昌可以預決至如興水利廣畜牧亦皆地方官應辦之事宜令各省編作課程隨時咨報臣部稽覈如果辦有成效再當酌量奏明給獎此振興農務辦法之大概也抑臣等更有進者農學之進步誠以學堂爲權輿惟學堂辦法亦有宜實事求是詳細預算者蓋小民終歲勤動全恃所入以資事畜未有能俟卒業始爲農夫者斯一難也胼手胝



足既已不勝其勞又絕少輟耕鬻學之時斯二難也是以東西洋各國於農務學堂必延訂專門教習凡土質之化分種子之剖驗肥料之製造氣候之占測皆設立試驗場逐一考求縱人觀覽務使鄉民心領其意咸知舊法之不如新法樂於變更初無強人難行之事至於學堂請肄尤應擇農隙之時查北洋大臣袁世凱現在天津設立半日學堂教養貧民子弟以半日為課程半日聽其謀生用意最為美善現在各省請求農務尤宜仿行其法除省會應設農務學堂及繁盛商埠酌設試驗場外應令各州縣所屬鄉村多設農務半日學堂庶被鄉曲編氓皆得以時往學實於開通風氣大有裨益以上數端軍等公同商酌均係切實辦法不尚空言如蒙 俞允應請明降 諭旨飭下各省將軍督撫通飭各府廳州縣將應造之地畝冊土性表詳晰編造彙報軍部核覈其農務半日學堂應迅速次第開辦以冀涸利源而收實效 上諭商部奏請通飭各省振興農務一摺據稱商務初基以提倡土貨為要義而商之本在工工之本在農非先振興農務則始基不立工商亦無以為資振興農務之法不外清地畝辨土宜以及興水利廣畜牧設立農務學堂與試驗場請飭各將軍督撫通飭各屬將地畝冊土性表詳細編造報部等語所陳不為無見著各省大吏通飭各府廳州縣認真確查極力請求一律切實興辦以廣種植而裕利源○癸丑予故甘肅新疆巡撫饒應祺於甘肅建祠○甲寅諭禮部奏冬至令節次日行朝餼禮一摺朕欽

奉 慈禧端佑康頤昭豫莊誠壽恭欽獻崇熙皇太后懿旨著停止行禮欽此該部知道○乙卯諭朕欽奉 慈禧端佑康頤昭豫莊誠壽恭欽獻崇熙皇太后懿旨有明年七旬萬壽闈澤覃敷所有在京四品以下官員現章減放三成俸米八旗兵丁現章減放一季甲米均著加恩全數放給一年其各省貧民著每省賞銀二萬兩由藩庫給發以示嘉惠欽此朕祇奉 德音著各衙門欽遵辦理○袁世凱奏據長蘆鹽運使汪瑞高詳稱蘆綱各岸引鹽最重秋運蓋每年春運不過三四成秋運總在六成以上其下西河艱阻之岸必趁秋水暢旺將統年應銷之鹽一次運出方不誤銷故秋運實爲通綱緊要關鍵而各商告築亦以秋運爲最急長蘆鹽商殷商無幾累商甚多歷屆秋運往往向錢鋪通融以作運本多者借銀數萬金少者亦數千兩用能迅速趕運無誤迨兵燹以後殷商多變而爲累商更困莫能支重以津市元氣大虧物力凋敝銀根短絀周轉不開該商等稱貸艱難僅恃搜括家財竭蹶從事而力量微薄築運無多近來市面雖稍疏通但積困之後驟難復元彼此挪借鉅資仍不能如從前方便疊據各商以秋運期迫運本難籌籲懇撥借公款以資接濟而濟眉急惟庫儲奇絀無可騰挪而環顧商艱亟須設法現由該商等稟經該司邀同津海關道唐紹儀向日本正金銀行商允借銀四十萬兩議定每年按八釐五毫行息約期兩年陸續歸還飭據綱總擬具合同呈由該司簽字蓋印分別存執卽作爲該司衙門擔保藉以紓

商力而維艱務等情詳請奏咨立案前來臣查釐綱素少殷商自遭兵劫益形疲累無力辦理委係實情惟鹽課爲國家餉源所繫秋運一誤課從何出若不妥籌補救各商財殫力竭將無人領引築運勢必相繼倒閉損礙大局殊非淺鮮現經該司擔保息借洋款四十萬兩俾資周轉該商等賴此挹注得以應時辦運不致虛懸引岸坐誤銷期實於國課商情兩有裨益下部知之○丙辰賞給京師八旗綠步各營兵丁半月錢糧開散宗室覺羅人等一月錢糧○丁巳上詣泰先殿壽皇殿行禮○己未諭軍機大臣等駐藏大臣桂霖奏籌備藏事三端一摺所陳不爲無見其應如何籌撥餉需及兩大臣分駐要地各節著錫良有泰桂霖迅即詳細會商妥籌奏明辦理○庚申慈福端佑康頤昭豫莊誠壽恭欽獻崇熙皇太后萬壽聖節上率王公百官在排雲殿行慶賀禮○甲子諭前據御史梁文燦奏山東福山縣知縣李舒聲諱災勒捐各款當經諭令周馥確查茲據查明覆奏所參各節毫無實據惟該縣在任日久毫無政績辦事疏忽不治輿情所請原品休致不足蔽辜李舒聲著即行革職以示懲儆餘依議該部知道○商部奏臣部奏定章程內開擬招商設立鐵路礦務各項公司如一時官本籌集不易全係商股承辦者應由臣部隨時維持保護等因所有鐵路公司自應訂定專章俾資遵守查前光緒二十四年十月間統轄礦務鐵路總局大臣曾經奏定礦務鐵路公共章程二十二條通行在案臣部綜緝商務礦路

事宜奉 旨歸併臣部辦理除礦務章程上年七月間欽奉 諭旨飭令劉坤一張之洞採擇各國礦章詳加參酌妥議現在張之洞尚未議定應由臣部先擬試辦章程再行奏 聞外查鐵路章程有從前訂定之條現在應行修改者亦有從前章程所未該現在應行增補者臣等公同商酌擬重訂鐵路簡明章程二十四條開具清單恭呈 御覽如蒙 俞允即由臣部通行各省遵照並咨明外務部照會各國駐京大臣備案得 旨如所議行○乙丑諭朕欽奉 慈禧端佑康頤昭豫莊誠壽恭欽獻崇熙皇太后懿旨明年七月為壽闈澤覃敷其各省貧民著每省實銀二萬兩由藩庫給發以示加惠○諭前據御史黃昌年奏參浙江運司黃祖絡貪橫欺罔各款當經諭令李興銳確查茲據查明覆奏已故浙江鹽運使黃祖絡性近貪鄙不恤人言實屬辜恩濫職著即行革職浙江長興縣知縣畢治策操履不端劣劣昭著著山陰縣知縣趙長保行為乖謬物議沸騰均著革職永不敘用慈谿縣知縣王家驥代認公獄跡涉營求著開缺另補劣幕李莊華即李杏泉盤踞把持罔知檢束著即驅逐回籍不准逗遛餘著照所議辦理該部知道○惲毓鼎奏臣竊見商部奏陳振興農務一摺實事求是歸本於農具見該部籌畫之苦心富強之本計其中辨土性勸種植尤足盡地力而便民生但使經理得人自可蕃昌有象惟清丈地畝一事最易擾民有不能不熟思而審計者請為我 皇太后 皇上陳之溯自中興以來民間田畝久經釐定丁

口審息荒田以次闢耕卽以臣原籍江蘇而論三吳賦稅之重甲於天下山陬水澨無不墾之田自經剛毅辦理清賦民田無復隱匿是江蘇一省似可無庸重議丈量矣卽以他省言之安徽廣東亦曾相繼舉辦均以有擾民之弊無增賦之利旋卽中止兩省如此餘省情形大抵相同今若概議丈量州縣之操切胥吏之需索鄉董漕總等之上下其手其弊必接踵而生商部原奏雖欲責成地方官不用差役嚴辦土棍以杜需索騷擾之弊無如州縣雖極廉平決不能徧履阡陌家至戶到必須假手胥役倚辦鄉董經營方能集事天下無不擾官之鄉民亦無不擾民之胥役又斷不能保州縣官皆極廉平臣恐清丈一行民間從此多事矣方今廣西匪亂未平東三省警端方起民心惶惑已極不安若再以此擾之則游勇會匪之徒必且借端煽惑效未著而亂先萌誠不可不慮天下事立法之始雖甚嚴明而不能保奉行著之皆得其人良法美意往往滋弊况茲事體大關係匪輕擬請 特降諭旨飭令各督撫體察情形熟極利弊妥議開辦總以不擾民爲第一要義使天下皆曉然於 朝廷愛養民生慎重如此則民心固結愛戴益深尤有裨於時局左紹佐奏 臣頃閱邸鈔見商部議請清丈地畝令各省將軍督撫以地畝冊繪圖貼說呈送該部等因臣反覆尋思見其造端甚大擾累滋多究其所歸不過以生靈之膏血飽吏胥之貪饕於國計無絲毫之補而閭閻騷動民怨沸騰弊有不可勝言者伏思時事艱難強鄰逼處圖治之法惟在

固結人心而固人心之法惟在與民休思養其元氣勿傷之而已該部貿然創爲清丈之說無事生事騷動遠近各省之人心使有田者皆不得安其生爲朝廷斂無窮之怨若不及時停止數月之間遠近傳播於大局實有關係請爲我 皇太后 皇上縷切陳之夫清丈地畝以良有可行之尙不免於擾累若以貪黷者爲之則民不堪命矣而良有司又不可多得也蓋清丈地畝有必需之費如弓手書手索手算手繪手必以薪工僱募每日必給以火食此必需之費也如廠舍樁繩木植界牌紙張筆墨此又必需之費也如田主窻遠必裹糧守候而官司臨蒞必竣事而後能去此又必需之費也官司履勘不能無隨從之人加以弓索書算繪圖諸手舟車所至冠蓋成羣勢難踴處必須設局設局則必有局用此又必需之費也自縣至府至道至司至院以至於部所有造冊提冊收冊駁冊經承需索層累不窮此又必需之費也費於何取必派之於民廉吏少派貪吏多派然既不能不令其派之民則又何能禁其不多派乎是猶縱虎狼以噬人而曰爾勿多食其孰信之至若清丈地畝之害姑以其易見者言之其始必派屬長里長奸役妄舉小民畏懼求脫甲賄得免乃舉乙乙賄得免乃舉丙朝夕換擾累橫生轉移之間不知破壞幾家而奸役所得業已不貲此愈報之害也自粵捻兵火之後民間契券每多遺失舊業相安奸民無從生心一經丈量勢必迫尋舊契愚民無從措手宵小因之訛索訟獄繁興告訐滋起此契券之害也印烙

衙弓恐不可考胥吏意爲增減分寸之誤毫釐之差便爲詐局其或地形曲直難齊屋宇參差山勢崎斜水勢尖圓積算甚難則惟以弓手一言爲憑弓手未滿所欲豈免上下其手此用弓之害也春夏之時禾稼深茂勢多踰損冬時日晷太短所履無多若逢雨雪仍當罷歇故每積旬累歲莫能結束官司辦理庶政何能止營地畝一端此稽延廢事之害也其他舞文執法百弊叢生講張詭譎莫能究悉乃至經年累月合督撫司道府縣州縣之心思聚數千百萬閭閻長弓長索手書手繪手算手之人力奔走阡陌騷然煩費祇以供貪官汚吏無厭之谿壑其無謂也原奏所稱輕車減從不得任用差役然其勢必有所不能也豈有以一官而能兼弓算書索繪圖之役者乎又豈能徒步往來不食不飲終夜露處而能從事於丈量者乎此最易明也至於劣紳土棍得以肆其乘機搆訟之毒愚民受誣冤含無訴輾轉輾轉民生不聊藉端報復起意侵欺乃使劣紳土棍得以肆其乘機搆訟之毒愚民受誣冤含無訴輾轉輾轉民生不聊至於辨白既明則其家已破其有沉寃不得辨白者且原奏以魚鱗冊爲不可信則是意在翻異明子胥吏以簸弄之機影響之間於何取證一經轉移爲禍更必無窮言念及此可爲寒心現今廣西貴州賊勢未平沿江沿海會票諸匪伏莽尙多但能安靜以養民力不可腹削以害民生但當和輯以固民心不可煩擾以傷民氣伏乞 明詔中外將該部所奏丈地畝之議即行停止以固人心而維大局並祈 嚴

飭該部務當仰體 朝廷與民休息之至意此後毋得冒昧陳奏生事擾民百姓幸甚天下幸甚 上諭  
翰林院侍讀學士惲毓鼎御史左紹佐奏清丈地畝未可遽行各一摺前經商部奏請通飭振興商務會  
諭令各將軍督撫嚴飭地方官認真稽查極力講求並未飭令清丈致涉繁擾朝廷體恤民艱首以不擾  
閭閻爲第一要義著各將軍督撫妥籌辦理毋稍誤會但將官荒民荒切實釐剔清楚派委廉能州縣確  
實稽查毋爲民害是爲至要○丙寅諭軍機大臣等戶部奏豫撥本年京餉一摺著該將軍督撫監督等  
務於本年五月前解到一半十二月初間全數解清不准截留改撥藉詞延誤○諭前因各直省軍制操  
法器械未能一律迭經降旨飭下各督撫認真講求訓練以期劃一乃歷時既久尙少成效必須於京師  
特設總匯之處隨時考查督練以期整齊而重戎政著派慶親王奕劻總理練兵事務袁世凱近在北洋  
著派充會辦練兵大臣並著鐵良襄同辦理該王大臣等受恩深重務當任勞任怨認真籌辦以副朝廷  
力圖自強之至意其應辦事宜著該王大臣等隨時妥議具奏○諭前據御史葉超雁奏參福建知縣陳  
其燦等各款當經諭令崇善確查茲據查明擬奏福建調署晉江縣本任德化縣知縣陳其燦被參各節  
雖皆查無實據惟性耽安逸懶於聽訟並有刻案多起僅予開缺另補未免寬縱陳其燦著卽行革職捐  
升知縣股挺積干預公事試用縣丞倪仁宏不知檢束著一併革職從九品韓學詩著撤省察看另片奏



查明廈門商局被參各款興泉永道延年任令局員朋比毫無覺察著交部議處著廈防同知通判鄭照巧卸局差應存規避著以縣丞降補候選直隸州知州楊榮忠朦混取巧遇事把持著卽行革職餘均著照所議辦理該部知道○以楊忠義爲廣東南韶鎮總兵○丁明諭江西學政吳士鑑奏呈進前峽江縣訓導李有棠所蓄違金二史紀事本末一摺據稱考訂完密請量予嘉獎等語著發交南書房閱看後再行請旨○戊辰夏時奏光緒二十七年江西裁改防營編立五軍以中軍爲常備前後左右四軍爲續備軍各五營嗣後裁存每軍四營惟後軍仍五營之額均經奏明在案查江西軍制當時僅就防營酌改規模本未全備其常備之駐省訓練者亦僅四營官弁勇丁一千二百員前護撫臣柯逢時復調兩營隨赴廣西續備分防各屬幅員既廣零星散布恆有顧此失彼之虞操練更有名無實竊思兵可百年不用不可一日無備上年政務處咨令各省常備軍於省會及扼要處所屯駐江西以省會爲根本而九江據長江上游實爲全省門戶形勢最爲扼要該處原駐之續備前軍分紮礮臺及餘干彭澤等縣彈壓巡防胥關緊要無論緩急均不能調往他處非另募一軍屯駐九江與省會一軍並峙皆作爲常備兩軍不足以壯聲威而備征調今擬於續備前軍內撥出二營分隸左右兩軍仍復五營制額所存二營裁汰其半專令防守礮臺而另募五營編爲常備前軍並將駐省之中軍一律添募均參用德日操法日加訓練以

備調遺營制餉章則仿鄂省之例量加增損此次酌改之後計常備中前兩軍共十營分紮省城九江兩處專事訓練續備左右後三軍共十五營分駐各屬專事巡防兵力較厚其防守砲臺一營即名曰九江砲臺營令九江關道就近統轄俾行坐兩不相妨該計月餉每年約多用銀十餘萬兩而添造營房開拓操場購備鎗礮器械等項尙須另行估計財力奇絀籌措爲難然爲備險不虞起見實不敢因陋就簡致異日或多貽誤除續備各軍應隨時整飭外現在奏調陝西候補道郭人漳檄令統領常備中軍奏調湖北補用參將岳嗣儀檄令統領常備前軍先將裁汰改編事宜妥爲辦理一面招募精壯剋日成軍俟辦有規模再將官弁勇丁及薪糧數目詳晰奏報下所司知之○己巳諭軍機大臣等都察院代奏浙江職員吳正倫等呈稱長興縣知縣畢貽策聽任庫書浮收漕糧請嚴追等語現在畢貽策業經革職仍著竊緝禁按照所指各節確查具奏毋稍徇隱原呈著鈔給閱看將此諭令知之○追予故內閣中書劉序列入國史儒林傳○辛未趙爾巽奏湘省紳商集股設立煉礮總廠並設阜湘總公司承辦中路南路各屬礮產設沅鹽總公司承辦西路各屬礮產經前撫臣俞廉三於二十八年六月專摺奏請立案奉硃批外務部路礦總局知道欽此欽遵在案嗣又據總公司紳董稟請兩公司合併爲一凡湘省未開各礮概歸總公司承辦並設購地總公司先集華股購買礮地以保自主之權亦經俞廉三電知外務部路

礦總局核准有案惟查礦地綿互費鉅事繁從前招股章程間有應者究以名稱不一權限不定未能十分踴躍奴才迭飭公司詳定章程廣招股本合力興辦茲據總公司紳董呈稱現已公同商定仍照前案合併爲一銷去卑湘沅黔之各名口湖南全省礦務總公司初次先集股本銀三百萬兩並力籌官股以資補助所有湖南全省礦產除礦務總局現在試辦之新化鐵礦常寧鉛礦平江金礦外皆歸總公司經理以後本省外埠各紳商有願承辦湖南礦產者祇准指一礦作爲總公司之分公司不得另設總公司一切章程必須遵守總公司所定其總公司辦公區域仍分爲中東西三路各設總理一人分任其事以專責成仍令辦總公司一切事件以期聯絡又由奴才選派監督官一員專司稽察國家稅項股本利息及一切財政各事宜並附設礦務銀行以挽利權而昭大信其煉礦購地各事卽由各路總理就近兼辦亦無須另立名目以歸畫一並據礦務局司道詳請其奏前來奴才覆查無異下部知之○壬申諭岑春煊奏特參貪汙殘忍各員請旨懲處等語著廣東連平州知州徐仁傑以關案作爲盜案正法之犯並無正犯諸多寬濫又兇犯周尊韓越獄任聽吏目甘怡捏飾以俄斃監犯謝新發作抵並有串通幕友僱騙劣紳門丁等苛罰平民勒索賄規侵蝕罰款情事玩法已極實堪痛恨著連平州事候補直隸州知州徐仁傑前署連平州吏目夜護司巡檢甘怡均著革職永不敘用發往新疆充當苦差代理上坪司

巡檢試用從九品王宗澤署理長吉里司巡檢試用從九品吳景賢著一併革職永不敘用餘著照所議辦理該部知道○癸酉諭前據江西學政吳士鑑奏准前江西峽山縣訓導李有棠所著選金二史記事本末一書發交南書房閱看茲據奏稱該員排纂成冊用力甚勤等語李有棠著賞給內閣中書銜以示嘉獎○諭署江西巡撫夏時奏請整頓軍政一摺據稱江西內河水師積弊甚深如驍勇充數短僱應名摺離礙船上岸滋事已久習為故常而每遇更換營官哨弁均須墊支頂腳銀兩營弁既輸鉅資即取償於空額及接手之員悉習相沿營務萬難起色現擬更定營制遇有各項情弊隨時撤參並嚴禁頂腳名目等語此等積弊恐他省皆所不免營務廢弛至此言之實堪痛恨著各省將軍督撫一體嚴查禁革切實整頓如再敢陽奉陰違即行從嚴參辦並予按法重懲總期力除銅習餉不虛糜兵歸實用以副朝廷綏靖地方之至意○袁世凱奏准商部咨整頓土貨請飭各省查報已辦未辦農工等項事宜奏奉諭旨著該部咨行各省將軍督撫查明遵辦欽此等因仰見朝廷振興商政擴張實業之至意欽服莫名臣維農工為商務根本而商之懋遷全賴農之物產工之製造歐美日本以商戰立國而於農業工藝精益求精經營策勸不遺餘力直隸地瘠民貧兵燹以後元氣凋傷民生困敝非於農工諸務切實講求不足以闢利源而資生計臣前在保定創立農務局先於城西設農事試驗場業經奏咨在案旋飭道員

黃琮李兆蘭商同洋教習考察東西新法購辦農器就場試驗附設農務學堂分速成豫備兩科速成科考取學生二十名教以種植蠶桑釀造糖酒等事課程以一年爲限目前頭班學生已將畢業續取二班二十名旌生十名山東附學八名亦皆入堂肄習豫備科考取學生四十名教以算學理化地理歷史金石動植物學暨各種農學限五年畢業科目較備習業較精爲農學高等程度再省城西郊舊有桑秧二百餘萬株小站營田舊有稻田四百數十頃併歸該局經理至津東一帶荒地甚多並飭逐漸招墾以興地利又就該局加辦商股設立煙草公司製造煙捲官商合辦冀收利權此直隸興辦農政之大概情形也上於上年莅津以後即先籌設工礦局就草廠庵附近地址建造工礦學堂延聘中外教習整訂課程初錄學生三十名教以化學染織醫道各科約三年畢業繼收八旗官兵學生四十名近又續行招考擬再取三四十名視各生年歲性質分高等尋常二級其秀穎者課以精深之理法庸鈍者授以淺近之技能派遣員周學熙等綜理局務並酌採日本章程籌辦考工廠蒐集各處土產陳列中外商品使商人入廠觀覽於工之良窳價之貴賤貨之銷滯皆可一一研究以資感發又另度地一區爲游民罪犯羈禁習藝之所此直隸興辦工藝之大概情形也抑臣更有進者凡創辦一切新政不過由官爲模範任其提倡鼓舞之責要在民間風氣漸開始可普興大利現臣督飭各屬勸諭地方紳民各就本境農業工藝

設法考究並令該局員等將農工應辦事宜認真整頓次第擴充庶於土貨出口漸期暢旺卽於洋貨進口稍籌抵制上佐 國家富強之業下開閭閻樂利之基實於商政不無裨益得 旨著卽切實整頓次

第擴充期收實效○甲戌諭增祺等奏查明新民府等處被災情形請分別蠲緩錢糧一摺新民府及西豐縣所屬地方本年秋間被水被雹田禾傷損計成災九分至五六分不等若將應徵錢糧照常徵收民力實有未逮加恩著照所請所有新民府等處均著照勘明被災輕重情形將應徵錢糧分別蠲緩以紓民力○諭商部奏粵紳承辦潮汕鐵路請予立案並飭保護一摺廣東汕頭一埠爲潮州咽喉現經候補京堂張煜南呈請招集華商股分於該處創辦鐵路自應官爲保護以期廣開風氣逐漸擴充著岑春煊張人駿飭令該處地方官出示曉諭居民俾知爲興商便民之舉所有該紳辦理勘路購地運料興工一切事宜妥爲照料毋得稍存膜視○乙亥命楊晟充出使奧國大臣○丙子諭軍機大臣等京師爲首善之區豈容流妓土娼遺跡其間以致窩藏匪類滋生事端況官員挾妓例有明條乃有不肖之徒不知自愛任意冶遊尙復成何事體著步軍統領順天府五城一律嚴行禁止如有前項情事無論何項官員均准一體拿究從嚴懲辦以肅官箴○諭兵丁等借支庫銀應扣本年十二月次年正月利息銀兩著加恩展限兩箇月○命溥倫致祭 東陵○丁丑以劉永亨署工部右侍郎○戊寅諭載振奏請開去商部要

缺一摺前因中國商務素未講求特設專官振興一切路礦農工諸政以載振才具開展又經出洋留心考查簡派爲該部尙書現當創設之初諸事方資籌辦其是否勝任自在朝廷洞鑒之中不得以人言指摘遂圖諉卸該尙書誼屬宗支受恩深重惟當盡心供職任怨任勞將應辦事宜次第妥慎籌畫以興商政而濟時艱所請開缺之處著毋庸議○己卯諭自來康濟民生端在澄清吏治州縣爲親民之官閭閻利病職當加意講求一切興養立教除暴安良苟能事事認真何患不日臻治理方今時局艱危羣生困敝宮廷軫念民瘼常若疢癘之在身大小各官宜如何實力拊循培養元氣乃近來各省州縣真能盡心民事者殆不多得或有瞻徇情面用非其人或有更替太繁視同傳舍皆足爲地方之害著各該督撫詳加考查隨時激揚除貪酷昏頑各員應卽立予嚴參外其安坐衙齋公事隔膜及專務鋪張並不知民間疾苦者均著分別撤任開缺慎選賢員補署不准徇私濫委如有循良勸職之員務令久於其任卽或缺分瘠苦亦當酌提津貼不得託名調劑動輒更調各該督撫受國厚恩務卽切實辦理用副朝廷視民如傷之至意○頒給浙江新建藏書樓匾額○庚辰蠲免順直武清十五州縣及開州等三州縣錢糧○予故浙江嘉興府知府許瑞光列入國史循吏傳